

Нег джилин эргид
хөөнэ тонь 110 миньгь
күрхми

Сарпинск района „Гигант“ колхозд 130 шаху өрк-бул хальмгуд нүүдл ирв. Ирсн хальмгудт колхозин правленьк гидгяр оньган өгэд, цугъяраднь баях пэтрь өгв, дав деер эдлвр-ууш кех хот-хоолар, хавр эрт ирцхэснй тэрх боднигин, нань чигн темснэ экяр тетгв. Гермүд болн хашахаалгь бэрдж авхар седсиднь колхоз мод өгв.

Колхоз хальмгудас нег бригад бүрдэв. Эн бригад хуучн гермүдиг ясад, шинэс кесг гермүд бэрв. Тер гермүдтнь кесг өрк-бул хальмгуд орв.

Иим сэн оньг өгчэхин хэрүд олн хальмгуд күч-көлсэн хармнл уга кёдлджэцхэнэ. Нег үлү, саянар кёдлджэхинь багъчуд—Джимбиева Т., Никеев Т., Болдырева Т., нань чигн кесг улс.

Шидр, Аршан Зелмд болсн олна хург деер, колхозин ахлач үр Жуков, олн амтнэ баях баядл ясрулхин, тедниг эмчин халхар эмнлгэнэ дөннь күргх, багъчудиг школар тетгхин тускар цаялгьвр кев. Дакад мах, үс, ноос элвгяр гаргьдж авхин тускар үр Н. С. Хрущевин келсн үгиг, нег джилин дунд хөөгьэн 110 миньгьн толгья күргдж өсгхми гидж колхоз бийдэн даалгьвр авсиг цаялгьдж келдж өгв. Эн хург деер үг келцхэсн хөөчнр үүрмүд Орилов Бова, Танаев Аньгья, нань чигн улс цугъяр халаджэсн хөөгьэн нег чигн гару угагъяр хадгьлнавдн, нег джилин эргид 110 миньгьн толгья хөөтэ болхин тёлэ зүткнэвдн гидж бийсдэн темдгтэ даалгьвр авцхав.

Б. БУЛЫКОВ.